



# FAATUATUA MA GALUEGA I SE LALOLAGI E LE LOLOTU

**Epikopo Keith B. McMullin**

Fesoasoani Lua i le Au Epikopo Pulefaamalumalu

Faesaite a le CES mo le Autalavou Matutua • 5 Novema, 2006 • Iunivesite a Polika Iaga

Ou uso e ma tufafafine, o outou o se vaiga mataina, ua o mai mai vaega eseese o le olaga ma itu eseese o le atunuu. Mafaufau foi i lenei afiafi, ua tatou potopoto faatasi i le salafa o le lalolagi. I le va o le taimi lenei ma le toe faasalalauina o nei tualumaga, o le a faapotopoto faatasi ai ma auai le autalavou matutua e le Ekalesia atoa i se sauniga e pei o lenei. E ofoofogia moni lava.

Sa i ai se mea ofoofogia na tupu i le konafesi aoa o le masina na te'a nei. Mo le toatele lava o le lalolagi, e le'i iloa, peitai o i latou e iloa ma alolofa i le upumoni, sa le mafaagaloina e pei o le papa o ni faititili e 10,000.

Toe mafaufau i le sauniga faaii. Mai le Aufaipese a le Tapeneko na molimoli mai ai le fatuga masani:

*Ia viia Oe, le Atua  
Mo le perofeta lelei.  
Ua taitaiina e ia,  
O i matou i ona po nei.*<sup>1</sup>

Na faafuasei, o alii ma tamaitai, o tama ma teine, sa potopoto i le Maota Autu mo Konafesi, sa tutula'i a'e i le migao ma le agaga faafetai, mo faamanuiaga sa ta'ua i lenei viiga. Sa tatou tutula'i i le agaga faafetai e faailoa atu ai ua toefuataina mai le talalelei a Iesu Keriso, ua tulei mai le Atua le Tama ma Lona Alo Pele mai le lagi, o Iosefa Samita o se perofeta, ma o Peresitene Gordon B. Hinckley o le perofeta a le Alii i le lalolagi i ona po nei.

O se aafiaga ootia faaleagaga. O se taimi na gaoioi ai tagatanuu o le malo o le Atua, i lalo o le uunaiga a le Agaga Paia, ma *tutula'i mo lo latou faatuatua!*

I lena lava taeao sa saunoa faamomoiloto ai ma le agaga faafetai Peresitene Hinckley e uiga i le loa o lona soifua ma lona malosi o i ai. O se faaitaiga e le aunoa o le faatuatua, ma sa ia toe ofoina atu lona soifua mo faamoemoega o le Alii. Na ia saunoa:

“Ua faataga au e le Alii ou te ola; ou te le iloa pe o le a le umi. Ae pe o le a lava le taimi, o le a tumau pea ona ou tuuina atu le mea silisili i o'u tiute. . . .

“ . . . Matou te galulue pea i le umi e finagalo ai le Alii. . . . A oo mai foi le taimi mo se tasi e sui, o le a sologa lelei lava le suiga ma e faia foi e tusa ai ma le finagalo o Le e ona Ia lenei Ekalesia. O lea, matou te agai ai pea i luma i le faatuatua—*ma o le faatuatua o le autu lena ou te fia talanoaina i lenei taeao.*”<sup>2</sup>

Sa fetau lelei ma musuia lana savali. Na oo mai o se faamanatu faaleagaga o le uiga moni o le olaga ma le auala e mafai ai e fanau a le Tama Faalelagi ona faaitoilalo mea faasoasa uma. Na oo mai i se lalolagi ua lilofia i le faalelalolagi, lē talitonu ma le agasala.

## Faalelalolagi

O a'oa'oga i mataupu o le poto salalau, e tele lo latou sao i le faaleleia o lo tatou lalolagi. O le aoaoina o le poto salalau o le tulaga aupito maua, e fuga tele mai i se siosiomaga o le amioatua, tiutetauave lelei, upumoni faaleagaga ma le faatuatua.

Ua tele naua le faaviivii i sosaiete faalelalolagi. Ua faamaualuluga tagata ma malo i o latou *tulaga faalelalolagi*, i lo latou taulai atu i “mea o le lalolagi, po o [i] mea e le o ni mea faalelotu, faaleagaga, pe paia.”<sup>3</sup>

O le tele lava o le lalolagi i ona po nei e vaai atu i le faalelalolagi o se mea taua mo se malo paleni, faamasinotonu, ma le faatulagaina lelei. O le mea lea, e le faatagaina ai ni faiga faalelotu i tulaga faalauaitetele; o aia tatau faalemalo foi e faalagolago i faamasinoga ma fono faitulafono, ma e saili foi e alii ma tamaitai faaiuga ma faaleleiga e ala i auala faaletulafono. O le mea matautia, ua le amanaia e le sosaiete faalelalolagi le mataupu o le ola faavavau, ua tuu mea uma i le tulaga o le lalolagi masani, ma o lea ua mafuli ai i *galuega e aunoa ma le faatuatua.*

E manaomia ai le mataitu ma se taumafaiga tele e aveai ai ma alii ma tamaitai o le faatuatua i se lalolagi o mea faalelalolagi. A oo ina lofituina faalelalolagi, o le natura o le tagata e “onosai muamua, ona gaulofa ai lea, ona talia ai lea.”<sup>4</sup> O loo faalofituina e le faalelalolagi ia tagata i na taunuuga i ona po nei.

E le pulea e le faatuatua ia Keriso o le Togiola o tagata, a o leni lalolagi faalelalolagi po o le lalolagi masani, e maua mai ai alii ma tamaitai e “faamaualuluga, manatu faapito, ova le faautava, e tetee i suiga, aasa le tutoatasi, e ta’aina e faanaunauga, o manaoga o le tino [ma] viiga o le lalolagi. . . . I se tulaga aoao, o le tagata o le lalolagi o se tagata e le faaolaina, o se tagata e savali . . . i le malamalama o lana lava afi. . . [tagai 2 Nifae 7:10–11]. O sea tagata e suia i le natura o mea o loo siomia ai o ia, na te faaogaina faailoilo ma ona tulaga mai i se lalolagi pau”<sup>5</sup> E puupuu lava ma manino lona faaupua, “O tagata o i se tulaga o le natura . . . e aunoa ma le Atua i le lalolagi” (Alema 41:11).

Talu ai o le faalelalolagi e masani ona faatuatua i le vaaiga e faavavau, e oo mai le taimi e mafai ona taitai atu ai i le le talitonu. I upu a Wolfhart Pannenberg, o se polofesa o suesuega faalelotu i le Iunivesite o Munich:

“O le tulaga lautele o le faalelalolagi e faavaivaia ai le talitonuga o le au Kerisiano i le moni o mea ua latou talitonu i ai . . . .

“I se siosiomaga faalelalolagi, e oo lava i se malamalama itiiti i le faa-Kerisiano . . . e faaitiitia. Ua le o toe avea o se mataupu o le teena o aoaoga faaKerisiano; o le toatele o tagata e leai sina malamalama pe o a na aoaoga . . . . O le tele o le salalau o le valea i le faaKerisiano, o le tele foi lena o le faailoga tagata e feagai ma le faaKerisiano . . . .

“. . . E atili ai ona faateleina le faigata i le faafesootaia faaleaganuu o lea lava manatu o le mea moni. . . . I le manatu o le toatele, . . . o aoaoga faaKerisiano, ua na o ni manatu e ono faamaonia pe le faamaonia foi e tusa ai ma mea e fiafia i ai le tagata, po o le faalagolago foi pe latou te tautala i manaoga e lagonaina e le tagata.

“. . . O le faatulagaga lautele e matuai faalelalolagi, e siitia ai se lagona o le lē āūga.”<sup>6</sup>

O le faatuatua ia Keriso ua suitulaga ai le faatuatua i le tagata. I aoaoga faitele ma manatunatuga lilo, o fesili po o fea na tatou o mai ai, o fea tatou te o i ai pe a uma le olaga, ma po o le a e pulea aoao ai le olaga nei, ua le gata ina le tautalaga, ae ua manatu foi i ai e le taua. O lea tulaga o le le talitonu ua avea ma se mala tele naua.

Na silafia e le Tama Faalelagi o le a tupu leni mea. O le Toefuataiga o le talalelei na toe faamumu ai le faatuatua ia Iesu Keriso, o le Fofoa, Faaola, ma le

Togiola. Na toe aumaia ai le malamalama sa’o i faamoemoega o le olaga. I le 1831, sa poloaia ai fanau a le Tama Faalelagi:

“O le mea lea, o a’u le Alii, ina ua iloa le malaia o le a oo mai i luga o tagata o le lalolagi, na ou valaauina la’u auauna o Iosefa Samita, le Itiiti, ma ua ou tautala atu ia te ia mai le lagi, ma ua tuuina atu ia te ia poloaiga; . . .

“Ina ia . . . faalauteleina le faatuatua i le lalolagi” (MFF 1:17, 21).

A o le’i faataatiaina le faavae o leni lalolagi, a o le’i i ai foi itutino o le atulaulau, sa ola alii ma tamaitai ma gaoioi ma i ai i latou (tagai Galuega 17:28). O le manatu faalelalolagi faapea, o le ola e leai se isi mea i talaatu o le saienisi o meaola, ua faafitia ai le mea moni autu, o le silafia o loo nonofo ma tagata soifua uma e faapea, “sa i ai foi tagata *faatasi ma le Atua* i le amataga” (MFF 93 :29; faaopoopo le faatusilima). O leni mea moni e le masuia ma e le mafesiligata foi.

O Etena i lona tulaga faaParataiso faatasi ai ma o tatou uluai matua, o Atamu ma Eva, na oo mai a’o lei faavaeina le lalolagi, o le tagata e ala i aafiaga o le olaga faaletino ma le Togiola a Keriso e mafai ai ona atoa, atiina ae atoatoa, ma avea ma se tagata ua atoatoa. O augatupulaga o peteriaka, afio mai o lo tatou Faaola mai le lagi ma Lana Togiola le mafaatusalia i le taulotoaiga o taimi, ma “taimi o le toefuatai mai o mea uma” (Galuega 3:21), lea na amata i le 1820, na faataatia ai le faavae lea e toe mafai ai e alii ma tamaitai, o tama ma teine, ona pulea o latou olaga ma siosiomaga i le “faatuatua i le Alii o Iesu Keriso.” (Mataupu Faavae o le Faatuatua 1:4).

A’u uo talavou pele, ua outou tutu i le tuufaatasiga o nei mea o tutupu i le lalolagi. “O mea ua tuanai o le folasaga lea, ma o mea foi ua folasia, o le a oo mai.”<sup>7</sup> O le mea e mafai ona tupu—o le mea e tatau ona tupu—o lou faatuatua ma galuega e o faatasi ai, o le a faaitiitia ai le tai fana’e o le le talitonu. O lau pito-laa lea i le olaga. O lou tiute paia lea.

### Tagavai o le Faatuatua

Na fetalai mai lo tatou Matai, “Afai e tusa lo outou faatuatua ma le fua o le sinapi, . . . e leai se mea tou te le mafaia.” (Mataio 17:20). Ua faamanatu mai ia i tatou e Peresitene Hinckley:

“A uma ona tautalaga ma faia mea uma, na pau le tamaoaiga moni o le Ekalesia o loo i ai lea i le faatuatua o ona tagata.”<sup>8</sup>

“I le faifai pea o lenei galuega tele, o le faatuatua faateleina o le mea lea ua sili ona tatou manaomia. A leai lenei faatuatua, o le a pa’ulia le galuega. A i ai le faatuatua, e leai se tasi e mafai ona ia taofia lona alu i luma.”<sup>9</sup>

O lenei ituaiga o faatuatua e tele nai lo se uiga, e tele atu nai lo le na ona talitonu, e tele atu nai lo le moli-mau i mea e lagona pe iloa e se tasi. O le faatuatua moni lava, le faatuatua o loo saunoa i ai lo tatou perofeta pele, e fanau mai ai le amiotonu i lenei olaga ma le faaolataga i le olaga a sau. E totonugalemu i le Atua moni soifua ma Iesu Keriso lea na Ia auina mai (tagai Ioane 17 :3). E faavae i le upumoni, e sosoo mai ai ma le malamalama, ma e faaatoatoaina i galuega. E afua ai ona malamalama ia tagata ma amio ai e faapei ona tatau ai ma fanau a le Tama Faalelagi. O lenei faatuatua “o le mataupu faavae maoae muamua lea [e mafai ai e i tatou ona maua le] mana, malo, ma le pule e faafoe ai”<sup>10</sup> o tatou mafaufauga, o a tatou amio-oga, ma ituaiga alii ma tamaitai e i ai o tatou tagata.

Na tuuina mai e le Aposetolo o Iakopo le fuafaatatau o lenei faatuatua:

“Se a le aoga . . . pe a fai mai se tasi ua ia te ia le faatuatua, e aunoa ma galuega? . . .

“Ioe, e mafai ona fai mai se tagata, O le a ou faaali atu ia te oe e i ai lo’u faatuatua e aunoa ma ni galuega; se ou te fai atu, Faaali mai ia te au lou faatuatua e aunoa ma galuega, ma o le a ou faailoa atu ia te oe lo’u faatuatua e ala i a’u galuega . . .

“. . . Faatuatua, pe afai e leai ni galuega, e mate lava ia, ina ua na o ia. . . .

“Po ua e iloa ea le auala [e] milo faatasi ai galuega ma le . . . faatuatua, ma o galuega foi [e] faaatoatoaina ai le faatuatua?” (FIS Iakopo 2 :14–15, 17–21).

Ua tatou faalogo soo e uiga i *tagavai*. O se tagavai “o se tagavai o le tulaga aupito sili [po o] se mea ua ausia . . . e fuafaatatau i ai pe faamasino ai ni mea e foliga tutusa.”<sup>11</sup>

E fa tagavai e mafai ona fesoasoani ia i tatou taitoatasi e iloa ai pe “ua faaatoatoaina” o tatou faatuatua patino ia Keriso e ala ia tatou galuega. O nei tagavai o (1) filifiliga tatou te faia, (2) o le loto faamaoni tatou te faaalia, (3) o le usitai tatou te faatino, ma (4) o le auaunaga tatou te tuuina atu. Faataga mai a’u e faamatala atu.

## O Filifiliga Tatou Te Faia

*Muamua, o le tagavai o le filifiliga.* O Au Paia o Aso e Gata Ai “ e talitonu ia faamaoni, amiotonu, nofo mama, agalelei, amio mama. . . . Afai o i ai nisi mea mama, matagofie, logoleleia, ma tauleleia, *matou te saili i ia mea uma*” (Mataupu Faavae o le Faatuatua 1:13; faaopoopo le faatusilima).

Mafaufau i se faifeau talavou o le a tatou faaigoa ia Pili. Sa ia aoaoina lenei mea i le Peraimeri. Sa talitonu o ia i ai i lenei taimi; o loo talitonu nei foi i ai. Peitai, ua umi se taimi o pagatia Pili i ponokalafi. Ua ia iloa le malolosi o ona faatosinaga ma ua avea ma vaisu. O taimi taitasi e fetai ai Pili ma lenei mea mataga, na te lagonaina lona faafulafula, maasiasi ma le le ta’uaogaina.

Sa auai Pili i le konafesi aoao i ni nai vaiaso ua tuana i atu. I le sauniga a le au perisitua, sa ia faalogo ai o saunoa Peresitene Hinckley:

“E leai se alii po o se taulealea i lenei faapotopotoga tele i lenei afiafi e le mafai ona faaleleia lona olaga. Ma e moomia ona tupu lenei mea. I le faaiuga o mea uma, ua tatou umia le perisitua a le Atua. . . .

“E aumai faatasi ma lenei perisitua se matafaioi tele ina ia agavaa ai. E le mafai ona tatou faatagaina mai ni mafaufauga eleelea. E le tatau ona tatou matamata i ponokalafi. E le tatau lava ona tausala ina i tatou i le faasaunoa i soo se ituaiga. E tatau ona tatou tutu maua ae mai na mea. ‘Tulai ia, Outou tagata o le Atua!’ ma tuuese nei mea i o outou tua ma o le a avea le Alii ma o outou taiala ma lagolago.”<sup>12</sup>

Sa tonu ia Pili, “Ua oo mai le taimi ou te tu atu ai i lo’u faatuatua!”

Sa alu o ia i lenei nofoaga faalilolilo, ma aumai ata mataga, o lipine ma tusi faatufanua, ma sa ia faamamaina lana potutusi mai musika matautia ma le leoleoa, ma fatuga mataga. Sa ia tapēina mai i lana komepiuta faasinoala uma i saite ponokalafi, ae faapipii se faamamā o le puipuiuga, ma tuu lana komepiuta i se mea e iloa atu e tagata lautele ina ia puipui ai o ia mai le toe faia foi o lana agasala.

Sa faailoa atu e Pili ana solitulafono i le Atua. E tatalo faatauanau o ia mo le malosi e salamo ai, ma faate’ase atu ai lenei mea leaga mai lona olaga. Sa ia sailia le fesoasoani mai lona epikopo ma lona aiga. I le iuga, ua lagona e Pili le faamautinoaga filemu, “Lo’u

atalii e, ua e i ai i le ala sa'o." O lona faatuatua, talu ai ana galuega, ua faamautinoa ai ma ua faamalosia.

O loo totoe pea mea e tele e tatau ona fai. O le a i ai le anapogi, tatalo, suesue i tusitusiga paia, ma le tele o loimata. O le a saunia e se epikopo lelei le fesoasoani e tatau ai. O le faatuatua ma tatalo a matua ma aiga o le a saunia ai le lagolagosua o loo manaomia. Ae ui i lea, *ua faaalua i le tagavai: Ua amata e Pili ona faaaoga le faatuatua e oo atu ai i le salamo—na ia faia ai le filifiliga sa'o!*

## O Le Faamaoni Tatou te Faaalia

*Lua, o le tagavai o le loto faamaoni.* O Au Paia o Aso e Gata Ai "e talitonu i mea uma lava ua faaalua mai e le Atua, ma mea uma o loo ia faaalua mai nei, ma matou te talitonu o le a ia faaalua mai le tele o mea silisili ma le taua tau le Malo o le Atua.

"Matou te talitonu i le matua faapotopotoina o Isaraelu ma le toe foi mai o ituaiga e Sefulu; ma o le a faatuina Siona (le Ierusalem Fou) o le a fausia i le konetineta o Amerika" (Mataupu Faavae o le Faatuatua 1:9—10) ma o alii ma tamaitai e "valaauina e le Atua i le valoaga" ma le pule paia ina ia faataunuuina ai (Mataupu Faavae o le Faatuatua 1:5).

O le loto faamaoni moni, e pipii faatasi ma galuega paia na amatalia a o le'i faavaeina leni lalolagi. Na ulufale atu i ai augatuaa amiotonu, ma tuuina atu o latou soifua mo le faalateleina o faamoemoega o le Tama Faalelagi. Ua tuuina mai ia te i tatou e faaauuina, e faaopopo atu ai ia latou galuega faapaiaina.

O se tala leni, ua silafia e nisi o outou:

I le 1856, na malaga mai ai Robert ma Ann Parker ma le la fanau e toafa mai Egelani ina ia mafuta faatasi ma le Au Paia i Iuta. Sa tulei saunoa se perofeta, ma o la latou matafaioi o le faapotopoto mai lea i le Great Basin ma fesoasoani ai i le fausiaina o Siona. I le avea ai ma se vaega o le aumalaga o taavaletosolima a McArthur, o lea sa tofu tagata taitoatasi o le aiga ma se vaega o le galuega. Na tulei e le tama ma le tina le taavaletoso mamafa, O Maxie (12 tausaga le matua) e tuleia foi, a o Martha (10 tausaga) e vaia Arthur laitiiti (6 tausaga le matua). O le pepe o Ada (1 le tausaga le matua) ua amata ona savali, sa sii, ma faatie- tie foi i le taavaletosolima.

I se vaimea o Nebraska, sa nofo ai i lalo Arthur laitiiti e malolo ma i'u ai ina moe. Sa lia'i mai faafuasei se

afa. Sa faatopetope le aumalaga ma tolauapi. O iina na latou iloa ai e le o i ai Arthur.

Sa le manuia le sailiga i ni aso. Sa tatau ona toe faaauau le malaga. O le taimi lea na gaoioi ai Robert ma Ann e tusa ai ma lo la'ua faatuatua. Sa tusa e Archer Walters i lana tusi faamaumau i le aso 2 Iulai, 1856, "Sa leiloa le atalii o Uso Parker . . . ma sa toe foi le tamā e sailia o ia."

Ina ua alu Robert, sa faamau e Ann se pulupulu mumu sesega i le tauau [o Robert] ma sa ia fai atu: "Afai e te maua o ia ua oti, afifi o ia i le pulupulu e tanu ai. Afai e te maua o ia o ola, ia e faaaogaina le [pulupulu leni] e fai ma fu'a e te aumaia ai se faailo ia i matou." Sa faaauau e ia ma isi o le fanau, le taavaletosolima ma tauivi ai faatasi ma le aumalaga.

Sa toe savalia e Robert le ala na sopo mai ai i le togavao mo le tele o maila, ma taumanuo, saili, ma tatalo mo si a la tama mafatia. Na i'u ina taunuu o ia i se nofoaga e soka ma tufatufa ai meli, ma o iina na ia iloa ai sa tausia ma vaaia le la tama e se tagata tuula'au ma lona toalua. Sa ma'i Arthur laitiiti ona o le tau ma le fefe peitai, sa faafogaina e le Atua tatalo a ona matua pele.

I luga o le alasopo i po taitasi, e taufai autilo ai Ann ma lana fanau. I le po lona tolu, a o taia i ave o le lagoto le iila o se pulupulu mumu sesega, sa goto ifo leni tina lototele i se faupuega o le lotomomomo i le oneone. O le matua vaivai tele, na moe ai Ann mo le uluai taimi talu mai aso ma po uumi e ono.<sup>13</sup> E moni lava e agalelei ma alofa le Atua; o a la'ua galuega sa tauia ai lo la'ua loto faamaoni ma faapaiaina ai lo la'ua faatuatua, ma ona o le fiafia o o latou loto na pepese ai le Au Paia, "E lelei, e lelei."<sup>14</sup>

O le Pepe o Ada, o lo'u tinamatua lea, sa tupu ma iu ina matua ma sa faaipoipo ai ma lo'u tamamatua, o Brigham Young McMullin. Ia o le aoaoga leni. Na te lei faatagaina lava lana fanau e faagalo o ia ma lona aiga na sopoia faatasi ma le aumalaga o taavaletosolima a Daniel D. McArthur ia lafanua valevalenoa. Na avea le tala o le pulupulu lanumumu ma a matou tala—na avea le talatuu o lo latou faatuatua ma a matou foi talatuu. Ma o lea sa matou "tutumau, [ai pea]"<sup>15</sup> ma sa mou malie atu faigata maoae e faapei o le sau pe a oso a'e le la.

O nei uluai Au Paia, *ua faaalua i le tagavai: O a latou galuega o se uiga iloga lea o le faatuatua, o lo latou loto faamaoni o se tagavai lea mo a latou fanau e ola ai.*

## O Le Usiusitai Tatou te Faatinoina

*Tolu, o le tagavai o le usitai.* O Au Paia o Aso e Gata Ai “e talitonu e faaolaina tagata uma lava i le Togiola a Keriso, pe a usitai i poloaiga ma sauniga o le Talalelei.” (Mataupu Faavae o le Faatuatua 1:3; faaopoopo le faatusilima).

O i tatou te mafaufau ai i se ulugalii talavou, e fai ma sui o i latou o loo ola ai i lenei lalolagi faalelalolagi. Sa iloa e David ma Michelle lenei mataupu faavae o le faatuatua, a o le'i taitai ona iloa e le tasi le isi. Ae tusa lava, sa la feagai ma atugaluga o loo feagai foi ma le toatele o loo auai mai i lenei faasalaluga. Tou te iloa, o David ma Michelle, ua tai luasefulu ma ona tupu o la'ua tausaga. Ua fai si leva ona la masani, la te “tafafa” faatasi, ma ua alofa le tasi i le isi. Ae ui o lea, la te le mafai ona fai se tonu o se faaipoipoga ma se aiga. Pe tatau ona tolopo le faaipoipoga seia mae'a a la'ua aoga, pe se'i lava ni a la'ua tupe, pe se'i iloa tonu nisi o o la'ua lava faanaunauga?

Sa la mafaufau foi i le faateleina o faaipoipoga ua tatala, o taua ma le gaogaosa o le lalolagi, ma le tumu saisai o le lalolagi. Mata e tumau la la'ua faaipoipoga? Pe tatau ea ona la aumaia ni fanau i se ituaiga lalolagi faapea?

Se David ma Michelle, faaoga lo oulua faatuatua! Manatua: “O le faaipoipoga i le va o se alii ma se tamaitai, ua faauuina e le Atua.”<sup>16</sup> “O e . . . ua faataisia e le Atua, aua ne'i faateaseina e se tagata.” (Mataio 19:6; tagai foi MFF 132:19–20). “O fanau o le tofi lea mai le Alii.” (Salamo 127:3). “O loo tumu le lalolagi. . . . ua lava foi ma totoe mea o i ai.” (MFF 104:17).

Ia e gaoioi i luga o mea ua e iloa e moni, ona faaatoaoina ai lea o lou faatuatua i au galuega amiotonu. O le a tutumu ma matagofie o outou olaga. Mulimuli i le faataitaiga lelei a o outou matua. Sa latou le gafatia ona faaipoipo, ae sa latou faaipoipo lava. O i latou foi, sa popole i taua ma gaogaosa, ae sa latou faaogaina lo latou faatuatua ma maua ai outou! E lei avea matafaioi o le faaipoipoga ma le aiga e tolopo ai a la'ua aoga; ae sa faatamaoigaina ai. Mo o la'ua lava faanaunauga patino, ua matua milo faatasi ai i le fiafia ma le soifua manuia o le tasi ma le isi, faapea foi oe, o ou uso ma tuafafine, ma fanau a fanau.

E le'i faigofie le olaga mo ou matua. Sa la matua faautauta lava ma faaputupu, ma ola ai i nai mea sa la maua. Sa feagai foi i la'ua ma fesili ma tulaga sa le

mafaia ona la taliina, peitai, sa la iloa o le ala na faauuina e le Atua Silisiliese, o loo folafola mai ai ina ia agai pea i luma. Ma ua matua sili atu lou “mauoa” ona o lena mea.

Mai a la'ua tala e faamatala soo, ua e iloa ai sa luga lālō foi mea uma mo i la'ua, “i itu uma e lua.” Peitai, o a la'ua galuega ua faapaiaina ai lo la'ua faatuatua.

Ua matutua nei i la'ua, ia faamautinoa. Ua le toe tiotio a la'ua laa, ua le tutusa lo la'ua finafinau, o o la'ua foliga mai ua le o se mea e masani ona sailia e le au faasalalau. Peitai, o lo la'ua alofa i le Atua ma le tasi i le isi, e atagia ai le faaloalo loloto ma le faanee-nee. O faigata o le olaga ua mafai ai e i la'ua ona maua le poto, onosai, ma le loto faafetai. I nai auala laiti ae taua, ua avea ai i la'ua ma “aano o mea ua faamoemoe i ai, o faamaoniga o mea e le o vaaia”(Eperu 11:1)—o mea sa le mafai ona la vaaia muamua i le olaga. Peitai, sa la usitai. O le faaogaina o le faatuatua, na faamauina ai i la'ua i le malumalu, sa faamanuina ai i la'ua i ni fanau, ma ua iloa nei le pogai moni o le fiafia. *Ua faaalii i le tagavai: O le usitai e aumaia faamanuina o le lagi—sa aumaia ai i ou matua, ma o le a faapena foi ona fai mo oe.*

## O Le Auaunaga Tatou te Tuuina Atu

*Fa, o le tagavai o le auauna atu.* O Au Paia o Aso e Gata Ai “e talitonu i le Atua le Tama Faavavau, ma Lona Alo, o Iesu Keriso, ma le Agaga Paia. . . .

“Tatou te talitonu . . . o le a nofo tupu lava Keriso i le lalolagi; ma o le a faafouina le lalolagi ma maua lona mamalu faa-parataiso.” (Mataupu Faavae o le Faatuatua 1:1, 10).

E tele atu lo tatou iloa e uiga i le Aigaatua nai lo mea ua iloa e tagata uma—ma o mea ua tatou iloa, e moni ia. E le gata i lea, ua tatou iloa faamoemoega o le Atua mo lenei lalolagi ma meaola uma o i ai. Ona o mea ua tatou iloa, ma ona ua tuuina mai e le Alii i luga o o tatou tauau le tiute paia e fesoasoani ai ina ia faataunuuna, o lea e le tatau ai ona tatou faatalale i lo tatou avea ai ma tagata o le Ekalesia.

E i ai nisi ua tosina ina ia le manatu mamafa i ai, ona o le fefe ne'i foliga mai ua faalelotu tele foi. Latou te vaai i “le Ekalesia o se faalapotopotoga, ae le o se malo.”<sup>17</sup> “O, tupulaga o le tofi tamalii,”<sup>18</sup> ia avea le galuega a le Ekalesia ma le malo o le Atua e fai ma totonugalemu o lou olaga. A tofia e auauna atu, fai i ai “Ioe,” ma fai le mea sili e te mafaia. Faalogo mai i

le poloaiga lenei mai le Alii: “O lea, aua tou te saili i mea o lenei lalolagi, ae ia muai saili e atiina ae le malo o le Atua, ma faatuina lana amiotonu ona faaopoopo ai lea o nei mea uma ia te outou.” (JST, Matthew 6:38).

Toe fa aso mai le asō, i le aso 9 o Novema, o le a atoa ai le 150 tausaga talu ona toai taunuu paionia o le aumalaga mafatia o taavaletosolima a Willie, i le Vanu o Sate Leki. Sa latou tauasa mai i le puapuaga tele ma le oti. E toatele ola na faaumatia i afa ma tulaga na faavaivaia ai i latou—e toatele atu na laveaiina e le au laveai.

O Levi Savage o se tasi o i latou na taunuu mai i lenei aso. O loo tusia i le talafaasolopito lona faamaoni, ma ana galuega naunautai e laveai le Au Paia ma aumaia ma le saogalemu i latou i le vanu. Peitai, e le'i amataina lana galuega viia i laufanua o Wyoming, sa ufitia i le kiona. O le isi lenei itulau, atonu o le itulau lau-aluga foi lenei, i se olaga faapaiaina o le auauna atu.

Sa papatisoina Levi ia Iuni 1846, i le 26 o ona tausaga. O le tali atu i le valaau a le perofeta ina ia agai i sisifo, sa ia tusia ai “sa matou sauniuni i le mea sili matou te mafaia mo se malaga umi i se atunuu e le masani ai, ma ia i matou lava ia, e matua le iloa lava e se isi. . . . Sa matou faatofa i o matou fale tuai . . . ae faatu atu lo matou ala i sisifo, ma le le iloa o le nofoaga o le a taunuu i ai, sa na ona faamoemoe e taunuu i se vaomatua i sisifo o Atumauga Papa.”<sup>19</sup>

I le aso 16 o Iulai, 1846, sa toe tali atu ai foi o ia ma nisi alii totoa, i le uunaiga a le perofeta, e ulufale atu i le Autau a Mamona ma savavali i le tusa ma le 2,000 maila mai Council Bluffs, Iowa i San Diego, i Kalefonia, ma agai atu ai i Los Angeles. O iina na faamalololo ai i latou mai le tautua i le malo. E ui ina sa latou le iloa po o fea o i ai o latou fale ma o latou aiga, ae sa amata ona latou toe sopo atu i le vanu o le Vaituloto Masima Tele. O le ala na malaga ai Levi Savage o se isi faaopoopoga e 1,300 maila, i se vaega gaoa ma le matautia, peitai sa iu lava ina taunuu o ia i le Vanu o Sate Leki.

O i na amata ai e Levi ona tauivi ma alisi, sa faaipoipo foi, ma sa maua sona atalii, ma sa falelauasi lona toalua i ni nai masina talu ona fanau mai lona atalii. Ina ua mavae le sefulu masina talu ona maliu lona toalua, i le konafesi ia Oketopa i le 1852, sa tofia ai o ia ma nisi o uso faamaoni e le perofeta, e tatala se misiona o le talalelei i Siam (lea ua faaigoa nei o Taialani).

O le taimi lea, sa latou faimalaga ai i ni taavale solo-fanua i le talafatai o Kalefonia ma agai atu ai i le Vasa Pasefika. Sa latou folau mai San Francisco i Calcutta a'o agai atu i la latou misiona i Siam. O le tusiga o loo i le tusi faamaumau a Levi i le aso 29 o Ianuari, 1853, ua tatou maua ai sina vaaiga i loto o nei uluai faifeautalai. Na ia tusia:

“O lo matou vaa toa, sa uliina e se savili agimalie, ma faatonutonu atu ai lona ala i galu fafati o le vasa loloto i mea matou te faataunuu i ai; ae tuua lo matou nuu faapelepele. . . . Sa tofia saili e le tagata lona tulimanu e mafaufau loloto ai, ma o iina na toe tu mai ai le mafanafana o lona lava aiga, o le alofa o lona toalua pele ma fanau po o uo. . . . Peitai, o lea ua tofia nei e nofo i vaega motu mamao ese o le lalolagi, ae o le a le mafuaaga? Pe mo le faaputupuutuina ea o auro ma ario, po o le sailia mo ia lava o le mamalu, viiga ma matagofie o lenei lalolagi? *E leai, e leai lava! Peitai ona o le usitai i poloaiga a le Alii e auina atu le savali o le upumoni ma le . . . faaolataga i atunuu pogisa ma le faapaupau.* E le'i pine, ae taitasi le tagata i lona pa'usisi e mapu ma malolo ai. Peitai, pe o moe pe o ala, sa tumau pea ona alu solo lona mafaufau i mea moni na tutupu i le taimi ua fano, ma faamoemoe o le lumanai.”<sup>20</sup>

Ina ua maea lana misiona, sa folau Levi i lona aiga e ui atu i Boston, Massachusetts, ma malaga atu ai i le mea na ia fanau mai ai i Greenfield, Ohio, ma sa ia tusia ai ina ua taunuu iina: “Sa ou taamilo i le kelope.”<sup>21</sup> Sa ia faatasi atu i le aumalaga o taavaletosolima a Willie i le Aai o Iowa, i Iowa, lea na amata ai se talaaga e faavavau lona taua ia te ia, o lona aiga ma le Ekalesia atoa. O ana galuega i lenei talaaga maoae ua faapaleina ai se olaga o osigataulaga ma le auauna atu. Mai nei paionia, *ua faaalialia ai e le tagavai: O lo latou faatuatua ma galuega o se moli ta'iala i se lalolagi le talitonu, o la latou auaunaga foi o se mamananu lea mo i tatou taitoatasi e mulimuli ai.*

Tatou te ootia i upu mai le alii faifeau, o Frederick W. Faber:

*Faatuatua o o tatou tama, e ola pea,  
E ui i falepuipui, afi, ma le pelu;  
Faagaetia o tatou loto i le fiafia e maeu  
I taimi uma e faalogoia ai lenei upu viia.*

*Faatuatua o o tatou tama, tatou te taumafai pea  
Ia aumai malo ma nuu uma i lau afio,  
O le upumoni foi mai le Atua,  
E saoloto moni ai le tagata.*

*Faatuatua o o tatou tama, tatou te taumafai pea  
Ia aumai malo ma nuu uma i lau afio,  
O le upumoni foi mai le Atua,  
E saoloto moni ai le tagata.*

*Faatuatua o o tatou tama, faatuatua paia,  
Matou te faamaoni i lau afio seia oo i le oti!”<sup>22</sup>*

Ou te molimau atu, ou uso e ma tuafafine—o loo soifua le Atua i Ona lagi, o Lona suafa o Elohimā, ma Na te silafia Ana fanau uma, e tusa lava po o fea latou te o mai ai po o fea foi latou te aumai ai. O Iesu, o Le Paia e Tasi o Isaraelu, o Lona Alo Pele, o le Togiola o tagata uma. O Iosefa Samita, o se taulealea talavou, na valaauina i le siufofoga o le Atua ma Lona Alo Paia e avea o se perofeta, ma o le taunuuga o lena valaauina ua toefuataiina ai le Ekalesia moni ma le malo o le Atua i luga o le fogaeleele. Ua matuai faamanuiaina i tatou i le iloa o nei mea, ma o outou o’u uso e ma tuafafine pele, ua outou tutu i le tuufaatasiga o le tala faasolopito. Sa outou o mai i malo o le mamalu. O lou avanoa tulaga ese lenei e te faamaoni ai i le faatuatua, e fetuleni atu ai i luma e faia galuega lelei. Fai le mea ua saunoa mai ai perofeta. Sa faamoemoeina e augatupulaga ua mavae atu, ua laveaiina ai augatupulaga o le taimi nei, e faalagolago i ai augatupulaga o le lumanai, ma o le a taiaina oe e le Agaga Paia i au laa uma i le ala.

I le suafa o Iesu Keriso, amene.

## FAAMATALAGA

1. “Ia Viia Oe le Atua,” *Viiga*, nu. 10.
2. I le Conference Report, Sete.–Oke. 2006, 87; po o le *Ensign*, Nov. 2006, 82; faaopoopo le faatusilima.
3. *Random House Webster’s Unabridged Dictionary*, 2nd ed. (2001), “secular,” 1731.
4. Alexander Pope, *An Essay on Man*, tusi 2, laina 220.
5. *Book of Mormon Reference Companion*, ed. Dennis L. Largey (2003), 582.
6. “How to Think about Secularism,” *First Things*, Iuni–Iulai 1996, 27, 30, [www.firstthings.com/ftissues/ft9606/articles/pannenberg.html](http://www.firstthings.com/ftissues/ft9606/articles/pannenberg.html).
7. Boyd K. Packer, General Authority training meeting, Oct. 2006; tagai William Shakespeare, *The Tempest*, ed. W. J. Craig, Oxford Shakespeare (1924), vaega 2 vaaiga 1, laina 261.
8. I le Conference Report, Ape. 1991, 74; po o le *Ensign*, Me 1991, 54.
9. I le Conference Report, Sete.–Oke. 2006, 90; po o le *Ensign*, Nov. 2006, 85.
10. Joseph Smith, tuufaatasiga, *Lectures on Faith* (1985), 5, 8.
11. *Random House Webster’s Unabridged Dictionary*, “benchmark,” 193.
12. I le Conference Report, Sete.–Oke. 2006, 66; po o le *Ensign*, Nov. 2006, 60.
13. Tagai Boyd K. Packer, *Memorable Stories and Parables by Boyd K. Packer* (1997), 4–6.
14. “O Mai, Outou o le Au Paia,” *Viiga*, nu. 17.
15. “Tumau, Tumau, Pei o Mauga,” *Viiga*, nu. 160.
16. “O Le Aiga: O Se Folafolaga i le Lalolagi,” *Liahona*, Ian. 1996, 122–23.
17. Neal A. Maxwell, i le Conference Report, Oke. 1992, 89; po o le *Ensign*, Nov. 1992, 66.
18. “Tumau, Tumau, Pei o Mauga,” *Viiga*, nu. 160.
19. I le *Levi Savage Jr. Journal*, tuufaatasia Lynn M. Hilton (1966), xii.
20. I le *Levi Savage Jr. Journal*, 5; faaopoopo le faatusilima.
21. I le *Levi Savage Jr. Journal*, 59.
22. “Faith of Our Fathers,” *Hymns*, no. 84.